



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сто-
роны 60 зл., $\frac{1}{4}$ стороны 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долгом
оголошеню значна знижка.

Контото чекове Нр. 404.155.

Ище ест на складі иллюстрованный календар „Лемка“ на рок 1937. Крім того выдано также малый кышенковый календарик для дітей и великий календар стінный.

Ціна одного экземпляра выносит 50 грошей

и кошты пересылки. При замовленю понад 10 календарей кошты пересылки покрыват администрация „Лемка“, котра дае также оден календар даром.

Доход с малых календариков, котрых ціна выносит 10 грошей, перезначае на Руску Бурсу в Горлицах.

Редакция.

О добро нашей молодежи.

В попередном числі нашої газеты писали мы о том, як обезпечити належитую опеку дітям, находячим ся в передшкольном віку.

В увагах тых порушено справу заклада-ня дитских приютов, где діти, находячи ся под фаховым присмотром, набрали бы добрых привычек, становячих основу их дальшого розвою.

Але и найліпши приюты и наилучше поставлена наука в школі нич не поможут, если родичи сами не звернут больше увагы на выхование их дітей.

В многих селах водит ся зле. Мама, хотячи, штобы дітина не плакала и добре в ночи спала, дае нераз маленькой дітині горілку и тішит ся, же горілка помогла, бо дітина втихла и цілу ноч спала. Така мама забыват, або не здае собі справы с того, же дітина мусіла спати, бо она стратила притомность, так, як тратит ю и старый человек, коли ся упие. Различіе лем в том, же до упия старого человека потреба пол (або и больше) литра горілки, а дітина упиват ся уж от килькох капель. Але тоты капли шкодят молодому организму дітины страшно, бо они задержуют розвите костей и мускулов, убивают память и могут спровадити всякы недугы.

Виділи неодны с вас барз маленькы коники, якы звычайно показуют по цырках, але напевно никто не подумал над тым, же до таких коников доходит ся так, же жеребну кляч и молоды жеребята поит ся горілком, котра вздержуе рост коня. Через таке опива-не килькох поколінь, коники стают ся чим-раз меньше и нераз высота их не выносит ани 1 метер.

Тото само діе ся также с организмом дітины, котру мама затруват в молодости аль-

коголем. Она также не розрастат ся належито, тратит память, учит ся с трудом и не може розвинути сил тілесных и умственных.

В одном с попередних чисел „Лемка“ подавали мы статыстыку преступлень и злочин-нов, с котрой видно наглядно, же причином великого процента тых всіх несчастъ ест аль-коголь. Килько биятык, килько прокляты, килько убийств пополняют люды в часі опя-нения. Читаючи о тых всіх несчастях аж страх бере, же находят ся няньове и мамы, котры позваляют а нераз аж и нагваряют дітей пи-ти горілку. Таж тоты родичи сами може не зна-ют, яку кривду выряджают своим власным дітям.

А тото позваляне дітям ходити на весіля, крестины и всі забавы, а также до корчмы, циж то не затруване моральне тых молодых и невинных діточок. Чого-ж доброго може ся там научити дітина? Крылаты слова, роспустны жарты, пиятыка, а часом и биятыка, неотвітны для дітей пісні — от всео, што видит там ді-тина. А часом быват ище планьше, бо дітина не лем видит опяненных, але и саму ю нонашка нагварят выпити пугарик.

Школа ту нич не порадит и учитель ест безсильный и буде такый, если ему не помо-жут родичи. Их обовязком ест не позваляти ходити дітям до корчмы и на забавы, а в пер-шой мірі, на весіля, бо весіля не для дітей, а діти не для весіля. Обовязком родичей ест посылати дітей до школы и от того обовязку могут родичей освободити лем барз важны при-чины, як хворота, але николи забава. Тым ча-сом в многих селах родичи легковажат собі тот обовязок, — в осени и на весну не посылают дітей до школы, бо ест работа в поли, а в зимі знов не приходят діти до школы, бо родичи

пошли на торг, або забаву, а діти, або пиль-нуют хаты, або за нянями тягнут до корчмы, або на весіле.

На том терпят діти, бо не лем не вынесли со школы потребных им пак в житю відомо-стей, але ище што планьше, набрали в корчмі и на забавах много шкодливых привычек, ко-тры нераз переходят в налогы и стают ся при-чином несчастья многих родин.

В Америкі, где с причины контрабанды алькоголю, розвинул ся в страшный способ бандытизм, найстрашнійшого бандыта назва-но „врагом Америкы Нр. 1“. Такый бандыт не мог ся долго укрыти, бо вся полиция почитала собі за точку амбиции зловити его як найскор-ше. Таким врагом нашим Нр. 1. ест алькоголь и приучане дітей до пия. Тому врагови по-винни мы всі выповісти завзяту борбу. В пер-шой мірі покликаны сут до того родичи, котры под жадным взглядом не повинни позваляти дітям ходити на весіля, забавы и до корчмы, и пити дітям горілку. Велику ролю могут ото-грати в той области священники, маючи до распорядимости проповідальницу и сповідаль-ницу.

Памятам одного священника, котрый в своей парехии зарядил, же до оконченного 15-го року житя діти не сміют ходити на забавы, ани пити горілки. Справі той посвячал много про-повідей, а при сповіди каждую маму и каждого няня пытал ся, ци перестерігат его заряджене. И результат был добрый. Родичи не лем при-выкли до того, але по якомси часі дяковали священнику за тото мудре заряджене. На жаль священник тот умер и его мудра наука пошла в непамять.

Але она може ся принять в каждом селі, як лем родичи, священники и школа подадут собі руку и разом злученыма силами возмут ся до борбы с тым завзятым врагом Нр. 1.

—:—

Идеово-политична декларация полк. Коца.

Дня 21. т. м. оголосил полк. Адам Коц идеово-политичну декларацию, котру в скоро-чно подаеме:

Декларация тот ест оперта на словах Маршала Едуарда Смиглого-Рыдза, высказанных дня 24. мая 1936. р., же до належитого организова державы потреба в першой мірі организова „волю людску” котра повинна приняти за свой клич оборону Польши.

Розвиваючи тоту програму Маршала Смиглого-Рыдза, полк. Адам Коц выказує, якы цілі, задачи и дороги належит усталити, штобы обезпечити оборону Державы и экономичный и культуральный розвой ей населеня и подає, же норму нашого внутреннего жита становит:

1) Конституция,

котра ест основом ладу и порядку в державі. Она коротит самоволю давного сеймовластия, дає державі сильну власть, оперту о всемогучий авторитет Головы Державы, Президента Річипосполитой, котрый, стоячи на верху державной структуры, держит в своих руках власть основных рішень.

2) Оборона Річипосполитой.

Другым, важным элементом нашего жита державного ест армия, котра ест для народа образцом гарту, дысципліны и гражданского благочестия. Тоту армию окружают любов и пошановане цілого общества, котре розуміє ей роль и задания, звязаны с обороном Державы. Коло армии повинни ся всі груповати, а втотчас:

1) отробиме существуючи ище под взглядом экономичным и цывилизацийным шкоды, вырядженны нам через окупантов и

2) загварантуєме нашей Отчині спокойный розвой и певность завтрашного дня серед не певной атмосферы світа.

3) Народ и Держава.

Держава ест одыноком формом правильного и здравого быта народа, дає народови технику могучости и организацию его вічного розвою; тому ніт сперечности меже интересом народа и интересом Державы.

4) Костел католицкий и другы віроисповіданя.

Народ польскый ест звязанный с католицкым Костелом и тому Костел католицкий має быти окруженный належитом опеком. В отношении до других віроисповідань стоиме на точці вызначеной в Конституции и выходячей с традиционной польской толеранции религиозной.

Пята точка декларации ест посвячена коммунизму,

котрый полк. Коц рішительно отшмарят, яко форму правления не надаючи ся для Польщі. Польща мусит розвивати ся без потрясень и насильств, котры все вводят державу в грозне положене. Заховуючи основы приватной власности як и приватной предприемчivosti одинок, держава мусит мати право впливу на гармонийный розвой цілости продукции. Особенном опеком и контролем мусит держава окружити тоты галузи промысла, котры мають звязь с обороном.

Общественна структура Польши операт ся в своих основах на широкой масі работников и селян. От судьбы тых верств, от их добробыта, а также от их культуры и гражданского почутя залежит в великой мірі гармонийный

розвой Польши и ей будущность. О том мусит памятити правлене державы, с тым треба ся числити при плянованю и конструованю будущего жита Польши. Поширанє клясовой ненависти ест чуже польскому духови. Каждый, кто уцтиво выполняет свои обовязки ест гражданином о полной вартости. Жадна работа не понижат — понижат лем неробство и ліниство. Отношения меже работодателями и работниками мусят быти такы, жебы жадна сторона на мала кривды.

6) Справа села.

Ест то найтруднійша справа в Польщі. От правильной розвязки той sprawy залежит в великой мірі процес прироста сил державы. Теперешне положене села не ест явленем переходным, выкликанным конюнктуром, або совпаденем обстоятельств. На теперешне положене села складат ся велика минувность. Конюнктура впливат на змягчене або заострене положения.

На теперешне положене села зложили ся долги літа и численны причины. Трото тыж одно якеси средство не потрафит поправити того положения. Треба примінити цілый ряд средств, котры, дійствуючи одночасно и в скоординованный способ, дадут в результаті инший структуральный уклад села, влучаючи его в жите народового организма и дадут в конвенции поправу быта сельского населеня и користь для державы.

Видиме слідуючи средства, котры могут поднести село:

а) стремлене до перебудовы земельной структуры, значне увеличене гльобальной массы селянской власности. Перебудову тоту треба перевести рационально и доцільно, штобы не обнижити нашу рольну продукцию;

б) комасация и мелиорация;

в) поднесенє рольной культуры, штобы увеличити доходы властителя;

г) улучшение организации збыта и обміна рольной продукции;

д) законодательне противдїйствие дальнїшому роздробленю грунтовой власности;

е) организация рационального и дешевого кредита селянам;

ж) поднесенє просвіщеня и гражданского розвита серед селян.

Але тоты всі средства не усунут перенаселеня села. Тому треба поднести уровень нашего господарного жита, розвинути ремесла, промысел и торговлю, штобы надвыжка сельского населеня нашла заробок в місті.

7) Розвите міст.

Розвите ремесла, промысла и торговли даст заробок надвыжці сельского населеня и роботу безработным масам, а также даст финансовы силы державі.

8) Польска культура

в науці и штудії повинна быти в тісной звязи с державом и видіти свою ціль в выгяданю и отданю державі новых жерел богатства и силы.

9) Справа меньшинств национальных.

С национальнымы меньшинствами хочеме удержати братске сожителство. Здаєме собі справу, же мають они свою отрубность и тоту отрубность их мы признаєме, если она не шкодит интересам нашей державы и если тоты их

отрубность не перераджат ся в ненависть и в средство для розділеня их и нас кытайским муром.

10) Не можна тратити часу.

Формулюючи наши взгляды на теперешне положене Польши и подаючи коротко напрям, в котром мы хочеме вести нашу роботу, мы протягає руку ку всім, кто хоче приступити до обічой с нами діяльности. Мы протягає руку — всім поверх всякого рода стін и перегородок, котры до тепер направду, або лем в воображеню ділили наш народ. За тьма стінами останут лем политичны спекулянты, котры захотят боронити свои личны, або партийны амбиции и интересы. Оживлены чистыма наміренями, звертаєме ся ку людям чистым и добросовістным, желаючим робити в користь Отчизны.

Долго приглядали мы ся житю в Польщі. Долго ждали мы на тот момент, коли укріпит ся переконане, же полякам не можна жити каждому отдільно, ходити своимы стежками, сходячи ся лем в певны моменты и праздники. Минул час — кончил полк. Коц свою декларацию — штобы напружити всі силы на то, штобы энергию каждого використати возможно экономично и рационально. Не можна тратити час, бо на місце тых идеовых одинок, котрых стежки зарастают уж травом, идут же лізным кроком крїпкы и здысциplinованы отряды, котрых веде одна воля ку одной цілі.

Центральне бюро организации полк Коца

Центральне бюро организации полк. Адама Коца находит ся в Варшаві при ул. Матейки 3. Под тым адресом належит посылати корреспонденцию. Бюра организации и особы згаджаючи ся с програмом полк. Коца посылают заявленя о том с поданем точного адреса. До тепер маса организации заявило готовность поддержати програму полковника Адама Коца и каждого дня зголошуют ся новы люди и организации.

КОМУНИКАТ

СТАРОСТВА В НОВОМ САНЧІ

в справі зголошаня о потребі и принятю работников.

В звязі с надходячим сезоном работ пригадую, же по мысли арт. 30 и 34 зарядження Министерства Труда и Социальной Опеки с дня 24. VI. 1932 (Дн. З. Р. П. Нр. 58, поз. 555 с р. 1932) работодатели, котры не будут зголошати в тут. Экспозитурі Воеводе. Бюра Фонда Труда (Новый Санч ул. Матейки Ч. 25) вольных місц и повідомяти о новопринятых работников, будут караны в администратийной дорозі через тут. Староство каром грошевом до 1.000 зл. с заміном в случаю неможности стягнення той кары на арест до 13 тыждней.

С огляду на конечность урегульованя отношень на тут. рынку работы повыеши постановления будут рыгорыстычно перестеріганы и в той цілі я зарядил часты контролі заведеня работы.

Подписанный
Новосандецкий Староста.

НЕ ЗАБЫВАЙТЕ О ЗИМОВОЙ ПОМОЧИ
ДЛЯ БЕЗРАБОТНЫХ!

Не шкодме собі саме.

В теперешних тяжких часах селяне мусят старати ся о того, шобы вытягнути грош со всего. Не могут они обмежити ся лем до веденя своего господарства, котре не все покрыват росходы, але мусят глядати якогоси посторонного заробку, котрым можна бы было залатати одну, ци другу дыру.

Одним с таких посторонних заробков ест для наших гор розвиваюча ся турыстыка. Приїдут в горы нартяры або літники, заплатят за поменшкане, купят молоко, масло, яйца, сыр, ярину и дырва и робит ся якыйси рух, при котром заробит тот, або другой газда. Прото тыж о тых турыстов треба дбати и поступати с ними так, шобы они выїзджали от нас вдоволены, бо лем втотчас вернут они в наши горы на друге літо, або зиму и припровадят с собою новых турыстов.

Тымчасом не всі розуміють добре значеня турыстыки для наших гор, бо „Иль. Кур. Цодз.” пише, же нартяры, котры в неділю сїзджали с Яворины, положеной коло Крыницы, нафрафили на выгоні, ведучом с Яворины до Злочкого поукладаны впоперек дороги галузи, котры утрудняють їзду на нартах, а вечером, як ест темно, могут наразити нартярей на каліцтво. „Иль. Кур. Цодз.” пише дальше, же нартяры пытали ся людей со Злочкого, чом так робят и люды отвітили им, же боят ся, шобы через набыты нартярами права переїзда, не утратили власности своих грунтов.

Не знаме, ци нотатка, появлена в „Иль. Кур. Цодз.” ест правдива и ци направду людей ктоси збаламутил и настрашил утратом власности их грунтов, але, если так ест, то такыма поступками шкодме собі самым, бо отстрашаме с наших гор нартярей и турыстов, котры приїзджают до нас с пінязми и тоты пінязы оставяют в наших странах. О них ся не страхайме, бо в Карпатах ест дост місца на зимущны спорты для нартярей и они, як их до себе зразиме, будут выїзджати в инши страны. Але мы через того стратиме. Тому во власном интересі и для власного добра повинни мы дбати о турыстов, окружити их опеком и привлекати ку собі.

В справі утраты прав власности грунту ніт найменшого страху. Через їзду на нартах по грунтах никто не набере прав до тых грунтов и они останут все власностью их дотеперешных властителей. Иначе представят ся справа дорог. Дорогами так битыма як и лісовыма и полевыма має каждый право їздити и ходити и того права никто не може отобрати, а кто перешкаджат другому в користаню того права, подпадат карі. Тому не можна городити дороги, ани шмаряти впоперек ней дерев и галузей, котры перешкаджают в комуникации, бо в разі выкрытия того, кто того зробил, може он быти потягнений до судовой отвітственности.

— :: —

Користи с охороны овадожерных птахов.

Всі хочеме мати в садах много красных яблок. С досвіда знаме однак, же не ест то легка справа, бо сад має много врагов и без належитого старания не даст много и красных овочей. Прото тыж розумный садовник цїнит каждого помочника в работах в саді. Одним с неоціненых помочников сут овадожерны птахи, як синички, шпаки и инши. Тоты птахи, кормячи ся выключно самыма овадами и их гусеницами сут природныма союзниками садовников, газдов и лісных, бо они помагают очищати дерева и ростины с хробацтва.

Як велика ест тотя помоч, выказуют наилучше обсервации природников и их обчислення. Н. пр. пара синичок на выкормлене себе и своих пташенят в продолжене одного літа потрафит выловити около полтора миллиона гусениц. Ктож аджек може в нищеню хробацтва доровнати тому маленькому пташкови? Напевно, никто с людей.

Кромі того ест то помочник, котрому не треба платити. Трото тыж розумный газда, садовник и лісник старат ся всіма способами, шобы серед дерев и грядок літало як найбільше овадожерных птахов. На счастье ест то барз легко осягнути тоту ціль. Мусиме лем взяти в старанну опеку тых малых приятелей. Всі старши повинни звернути увагу на дїтвору, котра так часто любит ловити птахи в розмаиты силкы и сїти и нищити им гнізда, выбєраючи яйчка и пташенята.

Читальні им. М. Качковского мают ту прекрасне поле до попису. В них повинно урядити ся ряд рефератов для старших и дїтей и переконати всіх, же ест того не лем знущане ся над безборонным сотворінем, але также и совсем нерозумне поступане на власну шкоду. Треба конечно допровадити до того, шобы окружити овадожерны птахи таким самым

опеком, яком окружаме ластивкы, соловей и боцаны.

Друга справа, то опека в зимі над тыма овадожерныма птахами, котры остают у нас на зиму. Птахи тоты в зимі не могут живити ся овадами, бо тых ніт, а штоси їсти мусят. Кормят ся аджек зернятками, котры находят на сухых бадылях ростин.

Але як сніг покрыве грубом веретвом цілу землю и настанут сильны морозы — птахам грозит голод. Втотчас люды повинни их поддержати и кормити. До той ціли служат дощечкы, котры треба розставити по цілом саді. Сыплеме на тоты дощечкы зернятка маку, конопель, лену, а часом кавальчикок несоленой солонины, або фалаток моркви. Менше пожаданы сут останкы корму с наших столов, як окыршины, бо они не сут кормом о полной кормовой вартости и заквашають ся от дожджей на дворі, через што могут спричинити хвороту у птахов.

Най не боит ся никто, же го птахи через зиму обїдят. Они їдят так мало, же выдаток через цілу зиму ест грошовый. За тото хосен в літі ест великий, а кромі того радость, повстаючу от сожитя с природом, котра ублагороднят наше жите.

Прото тыж до зимущной опеки над птахами треба передовсем втігати школьны дїти и молодеж, а также членов читальнь.

Наконец, шобы приманити птахи до саду, треба в них закладати штучны гнізда. Тепер маме переважно лісы и сады молоды, в котрых ест мало дудлавых дерев, в котрых птахи могут ся гніздити. Тот недостаток треба дополнити розвішенем птичных гнізд по деревьях. Гнізда такы робит ся с дощечок в виді маленьких хыжок.

Выдаток и заход не великий, а користь

може быти громаднa. Видиме тото в послідных літах на лісах, в котрых вынищено птахи. На дерева шмарило ся хробацтво и треба было рубати дерево на великих пространствах.

От того могут нас выратовати лем птахи, о котрых розмножене повинен ся старати каждый газда для власного добра.

Біда со щурами в порті гдынском.

Цікавы обычаи в світі грызунов.

На побережі в порті гдынском заобсервовано недавно незвычайно цікавый случай борбы меже котом и щуром.

В само полудне над пристанный басен выбіжал со своей норы величезный щур и намірял перейти на англицкий пароход, наладовый рыжом. На щура шмарил ся великий бурый кот. Заатокованный щур не пробовал втікати, але станул храбро до борбы. Вывязал ся долгый, завзятый бой, котрому с заинтересованем приглядала ся громада людей. В оден момент посчастлило ся котови выдрапати противнику ско и был бы го безсомнінно загрыз, если бы не тото, же другой щур шмарил ся на кота, перегрызаючи ему горло. Раненый смертно кот упал до моря и утопил ся.

Щуры во всіх пристанях сут правдивым несчастьем, бо нищат величезны массы товаров. Обчислено на основі втрат, же в гдынской пристани ест их около 1 миллион, а в порті нью-йорском — около 40 миллионов штук.

Борба со щурами ест трудна. Роблено пробы нищити их при помочи трующих газов и специальных труток, але тоты способы оказали ся безуспішны, бо щуры переносят ся с місца на місце перед грозячом им опасностью. Жіют они в добре здысциplinованой громаді. Зрештом приплываючи с ріжных сторон світа кораблі привозят штораз новы щуры, котры заполняют вынищены ряды. В ціли переведеня успішной борбы с тыма шкодниками, начали их точно обсервовати. В гдынской пристани заобсервовано цікавый случай, котрый каже вірити, же щуры неохотно зміняют місце перебуваня.

На оден шведский корабель, котрый привез кокосы и оліисты насіння, в часі задержаня ся при берегах, шмарили ся щуры. Коли корабель отплывал на море, щуры почали выскакати с корабля и плынути ку берегови, где ждали на них роботники с кыями.

Щуры сут незвычайно хитры. В одной прибалтийской пристани находили ся магазыны с провизантами, в котрых жило барз дуже щуров. Цікавым оказом был оден магазын, где была мука и зерно. Там были лем самы мыши. Факт тот звернул увагу обсерваторов, тым больше, же, як відомо, щуры охотно полюют на мыши. Тымчасом мыши жили собі спокойно в том магазині, а их „врагы“ (щуры) если там часом заходили, то лем по тото, шобы принести мышкам ріжны смаколыкы, як отпадкы, мяса, ярины, овочи и т. д. Мыши користали с тых „даров“, жили собі добре, приберали на вазі и робили ся отяжили. Скоро однак все ся выяснило. Раз в магазині, где жили мыши, спостережено много щуров, котры рыли великы отворы в місцах, где крыли ся мыши. По достаню ся до мысїх нор, напали на мыши и выносили неживы, котры складали на одно місце. По уконченю такого польованя на добре выкормлены мыши, появило ся в магазині ціла гурма щуров, котры в миг розділили мыши помеже себе и счезли в своих норах.

Що чути в світі.

Скарбы Яничка. В часі дорожньої роботи недалеко Кошиц найдено в землі барылку, а на ей дні парунадцет золотих монет. По окрестности росопшла ся скоро вість, же ест то часть скарбов славного збойника Яничка (Ваничка), котрого память заховала ся также в лемковских піснях.

Легенда гварит, же Ваничко закопал свои скарбы частями в розмаитых місцах. Тому населене коло Кошиц огорнула горячка глядани золота. Цілы громады пробують счастья в Тарховой и других селах, выходячи в ночи с чеканами, штобы перерыти пещеры горскы.

Напад коршуна на самолет. На бомбардующий итальянский самолет напал на дорозі с провинции Уолега до Аддис-Абебы великих розміров коршун (птих с гатунку астрибов).

Летчик, видячи атакуючого птаха дал салву с машинного карабина и ранил коршуна, котрый помимо того ударил своим сильным клювом в самолет и передыравил его, а пак поранил клювом и шпонами летчика в чело.

Летчик страшил притомность, але на счастье заступил его при стері обсерватор и приземлил самолет на луці в отдаленю 3-ох дней марша от найближшого итальянского постерунку. В том самом місци упал мертвый коршун. О том случаю повідомлено итальянскы постерунки при помочи радиостации, находячой ся в аероплані. До самолета со всіх стран надбігло місцеве населене, приносячи корм и сіно до постеліня.

Раненый летчик пришол до себе ище перед приземленем. Пару воевников абисынских предложило свои услуги итальянским летчикам.

Птах, котрый приневолит самолет до приземления ест рідким оказом горского коршуна о долготі крыл 3.5 метра. Коршун переломил собі клюв о поволоку самолета. Мал он на нозі обручку, зроблену с слонової кости, што вказує на того, же был он власностью одного с абисынских вождей и был уживаний до ловов.

Замах бомбовый на вице короля Абисинии. Перед тыжднем в часі, коли в присутствии властей цивильных и войсковых вице король Абисинии и итал. маршал Грациани по случаю уродин будочого престолонаслідника итальянского кн. Виктора Имануила роздавал дары церквам и бідным в Аддис-Абебі, с толпы шмарено в сторону маршала Грациани пару ручных бомб.

От выбуха бомбы были ранены: марш. Грациани, ген. Лиотта и голова коптийской церкви Кирил, а также пару автохтонов.

По замаху арестовано около 200 автохтонов, але виновника не найдено.

Стан здравя марш. Грациани не будит опасности, але Кирил и ген. Лиотта отнесли тяжкы раны. Последнему ампутовано ногу.

Повстанє абисынцов против Италии. Газеты англицкы доносят, же в многих частях Абисинии выбухло повстанє против итальянам. Пару меньших итальянских отрядов розбили абисынцы совсем. Столица Абисинии ест окружена со всіх стран войском, котре не впускает никого до міста. Аддис Абеба робит вид кріпостного табора. На улицах сут войсковы отряды с машинными карабинами.

В звязи с замахом на марш. Грациани уязнено на ново 3.000 абисынцов, котрых мають стратити без суда. Стан ген. Лиотта и абунны Кирила ест безнадежный.

Вісти с краю.

Уцтива дівчина и скупар дідич. Во Львові перед пару днями мал місце случай, котрый живо заинтересовал населене. Ученица торговельной школы, Мария Гуцуляк, бідна дівчина, нашла на улиці портфель, в котром было 5.740 зл. Уцтива дівчина отдала гроши на полицию. Оказало ся, же портфель был власностью властителя маєтку Дзеражня коло Томашова Любельского, Е. Макомаского. Коли пан дідич зголосил ся на полицию и доказал, же гроши сут его власностью, одержал гроши с рук комисара. Комисар зажадал 10% от найденых грошей для дівчины. Втотчас скупый дідич обрушил ся и рішительно заявил, же не даст нич дівчині, бо за уцтивость не можна платити. Полиция отдала справу до суду и суд присудил дівчині 10% найденых грошей.

Шестеро убитых, оден раненый. В селі Красне коло Калуша оден газда Василь Тимков мал со своима сусідами якыси поракунки и рішил помстити ся на них. Взял с хаты карабин и вышел на село. По дорозі встрітил Онуфрия Кульчицкого и стрілил до него, раничи го тяжко. Пак пошол под хату Параскы Павлишко и застрілил ю через окно. Так само позбавил життя Настю Кецман. Але оналілому преступникови мало было ище кырви. Побіжал до загорода Стефана Соложина и стрілами убил его, его жену Настю и двое малых дітей 11-літну Ольгу и 6-літнього Алексія.

Насыченый кырвю стрілил пак 2 раз до себе, раничи ся тяжко в голову.

Преступника и Кульчицкого перевезено до шпиталя в Калуші.

Забил на смерть злодія. В місточку Сколе над Збручом пополнено злочин. До хаты богатой родини Щербанов, котры недавно вернули с Канады, закрали ся в ночи злодіи. Коли злодіи бушовали в хаті, глядаючи грошей, обудил ся Иван Щербан и его сын Михаил и зловили одного злодія Стан. Томашевского. Звязали его шнурями и почали страшно бити, поддаючи его страшным тортурам, як выкручанє пальцов у рук и т. д.

По пару годинах знуцання ся, вышмарили на двор заляну кырвю и мало живу свою жертву. Томашевский ледво довлек ся до своей хаты и оповіл все. Перевезеный до шпиталя в Чорткові умер по пути. Обоих арестовано.

Дітина уратовала маму. В Крыжковицах коло Рыбника повісила ся на клямці 29-літня Амалия Коржонек. Находячий ся в хаті 5-літний хлопчик, выбіжал с хаты и на его крик збігли ся сусіды, котры отрізали матер и спасли ей жите.

Пес спас цілу родину. В помещканю одной родини в Быдгощі улетучал ся світляный газ. Спячу родину збудил вытем пес, котрый тым способом уратовал им жите.

Несчастный случай. Панько Гнатышак с Верхомлі Малой выбрал ся с коньом до ліса по дерево. В часі сїзджання с горы, Панько подважил коликом дерево. В том часі конь рушил и колік перевернул хлопа, котрый достал ся под дерево. Покаль збігли ся други хлопцы, Панько Гнатышак уж не жил.

Желізнодорожна катастрофа под Варшавом. Дня 24. лютого, недалеко Варшавы наїхали на себе два особовы поїзды. Машинист одного поїзда забил ся на місци. Его помочник выскочил с паровоза, але потолк ся сильно. Оба паровозы вышмарило с шин. Килькоро людей ест легко раненых.

Будова линовой колейкы в Крыниці. Выроблено уж проект будовы линовой колейкы, яка має ити от старой почты на верх Парковой горы. Колейка буде долга 640 метров и буде вывозити людей на терен положеный о 160 метров высий. Має она служити до вывоження людей, котры схотят выйти на верх Парковой горы, штобы пак сїхати на саночках в долину. Тор саночковый с Парковой горы ест долгый 1.600 метров.

Поклады каменного угля коло Ярославя. В селі Йодловка в пов. ярославском доокрестны хлопцы открыли значны поклады каменного угля. Уж в р. 1926. ведено ту розсліды над покладами каменного угля, але втотчас спротивили ся тому шлескы промышленикы и перестано дальших глядань. Тепер в виду нового инвестиційного пляну, предвиджающего в сандемірском окрузі поважный центр промышловый, числят на того, же правительство зверне увагу на открытый угель в той окрестности.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

за асекурує ся
в асекураційном Товаристві
ВИТА И КРАКОВСКЕ
во ЛЬВОВІ

Асекурацію принимают на цілої Лемковщині
представителі: гг. Осиф Ямовицкий — Крыница - Село
и Михаил Перелом — Сянок.